

Bevor i da afah, muess ig es paar Sache richtigschtelle. Also, pst, ig bi dr **Pfannehouer**

08

ig erkläre alles schpeter, aber vorab: Das isch e bewilligti Demo, i dischtanziere mi usdrück-lech vo jedere Gwalt, zum Bischpil, wenn öpper hie chunnt cho zuelose u nächhär wägem Lärme vo de Guggemusige usflippt und geit ga d Kampfjetlärminitiative anäh, lähneni jeglechi Verantwortig ab - di vorderschte 50 Lütt bilde dr freiwillig Ornigsdienst, u di räschtleche passe gägesittig ufenand uuf, dass niemer Gwalt aawändet. Isch guet, abgmacht.

Also, i hätt eigentlech gar ke Zitt gha für a d Fasnacht, d Globalisierig wüetet ou under üüs Schpitzechöch, i ha bis hütt Morge müesse e Nöi-Kreation vore Meertrübeliturte spezial am Liferant übergäh, vorgeschter hett d Wettbwärbskommission aaglüttet, wenn ig nid bis geschter znacht am zwölfi chönn iiwandfrei nachewise, dass me die Turte nid ou mit Cassis de Dijon chönn mache, de müess i ds Ganze europawitt usschribe.

Dasch fasch wi Schnitzubänk erfinde, aber ohni Pointe – ha überhoupt ke Gring u ke Zitt meh gha für anders. Zum Glück hett ds Trudi Gerschter gseit, si chömm mit – u sogar ds Söili isch mitzottlet. I ha mis Chochgwand hühü ungere Arm klemmt u bi i d Schtadt, ha mi amene schtille Egge wölle umzieh hingeremne Müürli – u de ghöri uf z Mal sone Rassubandi imene Hingerhöfli u ne Schtimm, wie wie -- -, eh loset säuber:

Manne – eh u Froue, hm, die Fasnacht isch die letschti Glägeheit, für üses Sicherheitsdisch-Dischpositiv Euro 08/15 im Massschartab 1:1 chönne z teschte. Die Demo isch bewilliget, aber grad deswäge tüe mir üsi Ueberprüefige vo verdächtige Individue knallhert dürefüehre – WI ZUM BISCHPIL DÄ CHOCH MIT DÄR SOU U DÄR GROSMUETER DERT !!!

U scho si sibeazăh zu allem entschlosseneni kantonali Bereitschaftspolizische rund um üs und enang uf de Füess umegschlange. *Was machet dihr da ? I tue mi umzieh für – wass ? Klamheimlech im öffentleche Ruum !! das isch es öffentlechs Erregnis !* Je dihr dank oo, da i däm Hingerhof Geit öich nüt aa, u wär isch das ? Jo bitteschön ich bi s Trudi Gerschter *Ha de bini dr Röiber Hotzeplotz* Isch au e schöös Märli, aber bitteschön, do isch min Personal-uuswiis *Ha mit däm chasch der gradsoquet ds FF – nei säge mer nümme, mitcho zur Personalkontrolle – momänt i orientiere: Anhaltung zwecks Identitätsüberprüfung, Dauer zwoo bis fuf Schtung, mir si logistisch ufgrüschtet, mir hei itz näbscht eim Computer no vom Alt-Polizeiminischer Blocher eine Schreibmaschine. Dir heit periodische Schtuelgang, äh, Zuegang zum, äh äbe, und es gitt Flädliisuppe. Und das da ?*

Dasch mis Söili, es wett wider mal --*Chöit dihr nachewise, dass das nid us Brasillie importiert isch ?* Also hallo, dihr sitt doch itz vor Kantonspolizei u chöit doch es Söili vomene Rindvich ungerscheide. *Rueh, wird abklärt, Identitätskontrolle, und dihr?* I gah als Choch a d Fasnacht. *Aha, Fasnacht, als Choch verchleidet, dihr läset meine kener Zittige, guete Ma, letschthin hett eine als Marcel Ospel verchleidet d UBS überfalle u hett e zwöischtellige Milliardebetrag klauet. Uf dr Bank si si no jitz am Zelle, wivii s genau gsi isch, u dr Gouner u siner Komplize loufe frei desume. Die Chleider wärde alli konfigu-konfitü-konfetti-äh eifach beschlagnahm.*

Aber loset, i bi dr Pfannehouer und ig sött ire Viertelschtund -- *Was Pfannehouer, wohär kennet dihr üse Gheimcode ? Wie bitte ? Aktion Pfanne, Polizei FAhNdigs-NETwork.* Sorry, chani doch nid wüsse *Itz wüssters – ouja, itz weiss er's .*

I bi total am Düreträje gsi, ohni Trudi Gerschter, ohni Söili, när hett er no gseit: *Chöit alls i fuf Schtung im Weisehuus cho abhole* Was Weisehuus ? Das tönt aber verdächtig nach Pflegchinder vo Riinach *Was ? das isch Hinder-Hinderziehig einer Amtsabhandlung, Abfüehre!* Und eine hett hinfürepäägget: *U fudleblutt abzieh u mit chautem Wasser drüber !! // Gfreite Mäder, das säge mer nümme – äh nei, das mache mer nümme, ds einte säge mer nümme u dises mache mer nümme, mir hei öppis glehrt, mir blibe höflech, Gfreite Mäder, Schafsecku !*

Zum Glück si mer dersider miner Zedle da i Sinn cho, u du hani gseit: Loset, ig kämpfe fürnes subers Bärn, mittere Tubeschiss-Initiative, fürne subere Baldachin am Bahnhof, City-Vereinigung, Gwärbverein, KMU, Altschadt-Leischt, We wisch vor you, Bahnhofreglemänt, dass me Tube cha wägwise, we si schisse, u aues uf dä schön nöi Baldachin, s gitt scho gnue lütt, wo säge, das Dach sig beschisse, u dr Bode drunger, mit au däne Chöderlig u iitschaupete Chätschgumine, u de Sigaretteschtummle ar Tramschtation, u die Redbull-Büchli u die Fastfood-Packige überau am Bode, de söu wenigstchens dr Baldachin no suber blibe, tubefrei, tubeschiss-frei, aui Tube söue tube !! *Aha, macht dr Fuchs ou mit ?* Klar, dr Fuchs schtigt aune Tube nache ! -- Zletscht bini du drvocho, aber aues hei si mer gno, di ghüslete Hose, dr Choch-Chittu mit de rote Chnöpf, u ds ganze Schminkzüg, nume da ds Haustuech hani grettet, has i Hosesack gschtöpft u gseit, das sig mi

Schnuderhudu – u dr Huet hani vor Harmonie vom Jimmy Gyger, hett er no chönne rette vor de Vandale.

Aebe, ds einzige woni no ha für öich, isch öich die Tubeschiss-Initiative vorschteile, hanes tolls Patronatskomitee binanger, ga aube ga frage, zum Bischpiu bim Mc Donalds. Grüessech, eh dihr verchoufets doch da das Wägwürfsgschirr *bitteschön, mer sait Einweg-Gschirr* Aber äbe, dihr verchoufets, u was söue de d Lütt drmit, we si fertig gfoodet hei, öb itz ein Weg oder dr anger Wäg furtgheie *also, mir unterschriibet fürs Patronatskomitee.*

U d Sigaretteschtumme-Induschtrie *Losezi, für die Zueschtänd isch nu das Rauchverbot i de Beize und Verchehrsmittel verantwortlich, dr Gsamtkonsum gaht zugg, eh bi öis in Europa – aber ich schpände für Ihr Initiative.* Oder dihr, Ungerschriftesammle? Kes Problem: *Bätuver-bott für Tube ? Unterschribeni sofort, wüu aus wo die bättle, schisse si grad wider. // Tube-schissverbot ? Sehr guet, sehr guet, schisse tüe sowiso nume die mit Migrationshindergrund.*

Ha no schnäu Zitt gha für bi der wunderbare Euro 08-Uhr verbi. Dihr, nume no 140 Tag bis zum Aendi vor Euro 08. U dert, näb dere Uhr, da isch es richtigs Häppening im Gang, da hetts Type, di decke eim nume so zue mit Wahlwärbiig, bi mer vorcho wi bi de Primaries i de USA, wobi de Type nah sis ender SUB-PRIMARIES. Da isch ufemne riise Plakat gschtande: RGM, u eine vordranne hett afah päägge:

Bärnerinne u Bärner, mir vo RGM, vom Reinigungsinschtitut Günschtig und Makellos, und ganz schpeziell mir vo der SP, vor Sicherheits-äh, Suberkeitspartei, also beides, also eifach alles, mir verschpräche n'öich: Bis zum 8. Juni isch die Schtadt suber. U de sölle d Fuessball-Fans us ganz Europa i üsere schöne Schtadt cho tanze u fiire, cho lache und juble, cho frässe und suuffe und d Fan-Zone vollchotze. U när hett er sones Karaoke-Mikrofon füregnoh und hett gsunge: Suberkeit – wäge dir si mir uf d Schnure gheit, dr Bodema hetts immer gseit, oh I believe in Sicherheit –äh Suberkeit. När bini zuenim und hane gfragt wägem Patronatskomitee. Du hett är gfragt: Isch dr Apéro vor oder nach dr Ppressekonferänz ? Während ! De chumeni, schicket mer zwo liladige, eini uf mi Name und eini – weiss i no nid so gnau. Eifach zwöimal mi ! D FDP isch ou dert gsi, di Freiwilligi Deponie-Partei. Mir si drbii, mir si für Freiheit und Sälbschtverantwortung, das gilt ou für d Tube, solang si nid schiisse. U ds Gummersloch-Bündnis isch ou dört gsi, u d GFL, Graffenried Flirtet mit den Liberalen, und d EDU – Enddeponie-Union, und Chemie-Verwärtigs-Partei CVP, u dr Pascal Mörgeli u dr Chrischtoph Couchepin. U eine hett gsunge: Di Nacht ischt oohne Ende, der Himmell oohne Schtärn, wir kämpfffen für die Wende, und hei dr Schori gärn, hahhahahhahah. Di Schwizerischi Vouksablagerigspartei. U eine isch ganz für sich elei dört gschtande u hett schtill glächlet und ab und zue gseit: Nume Hü-gli chume n'ig, nume Hü-gli chume n'ig.

Einzig schwarzi Schaf hetts kener gha – mi hetts tünkt, irgendöppis fähli ...

So dr Räschte chöit der ja säuber no läse – u ungerschribe ! U wenn d Bereitschaftspolizei sötti cho, eifach Rueh bewahre, i chliine Grüppeli i alli Richtige dr Platz verlah und sech schtill uflöse. Und wenn dihr aaghalte wärdet, eifach ds wisse Initiativblatt schwänke. Viu Glück im Läbe und adiö mitenang.

Pfannehouer 08